



REPUBLIKA E KOSOVËS - REPUBLIKA KOSOVA - REPUBLIC OF KOSOVO  
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL  
PANELI ZGJEDHOR PËR ANKESA DHE PARASHTRESA  
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.240/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtaret; Hajriz Hoti kryesues, Kujtim Pasuli dhe Ramush Bardiqi anëtarë, duke vendosur përkitazi me ankesat e Subjektit Politik, Lëvizja Vetëvendosje me seli në Prishtinë (LVV), të paraqitur kundër Subjektit Politik, Partia Demokratike e Kosovës (PDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë Fushatës Zgjedhore për Kuvendin e Republikës së Kosovës, që do të mbahen më datë 09 Shkurt 2025, në seancën e panelit të mbajtur më datë;30.01.2025, merr këtë,

V E N D I M

- I. Pranohen si të bazuara ankesat e Subjektit politik, Lëvizja Vetëvendosje (LVV), me seli në Prishtinë, Anr.240/2025, Anr.241/2025, dhe Anr.242/2025, të datës;29.01.2025.
- II. Subjektit Politik Partia Demokratike e Kosovës (PDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjorbë në lartësi prej 10.000.00 (dhjetëmijë) euro.
- III. Detyrohet Subjekti politik Partia Demokratike e Kosovës (PDK), me seli në Prishtinë, që gjorbën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datë;29.01.2025 PZAP-i ka pranuar ankesat nga Subjektit politik, Lëvizja Vetëvendosje (LVV), me seli në Prishtinë, Anr.240/2025, Anr.241/2025, dhe Anr.242/2025, të datës;29.01.2025, në të cilat pretendohet se më datë 28 Janar 2025, Qendra e Lëvizjes VETËVENDOSJE! në Prishtinë, ka identifikuar se në rrjetin social facebook të mbështetësve, Musli Obria në Ilogarinë të rrjetit social Facebook, ka shkruar "*PDK, ta ha zemrën, nuk lejojmë ne Albin Kurva pederica në Skenderaj*" dhe mbështetësi, Rasim Brahim Rexhepi, ka shkruar se "*Pushteti tu deponu dosje kundër çlirimtarëve Mimoza tu fol me Raidoçiçin serbisht kundër veteranëve, e sot në Skenderaj tu knu e tu kcy e tu provoku situatën, masa nuk pyet nuk ban me jan qu dur e gishta se drenicaku e merr tubimin, len shpirtin e ndeshkun rahat mani fushatat qysh i ka hije mu majte jo me pru kurva e loparë e me bo budallakina me qu dorë gishta. Drenicë krenohem me ty edhe kur je ne vësliteresi të uxitjes*". Më tej në ankesa pretendohet se i njëjti ka shkruar mbi foto ku shihet Albin Kurti, Aleksandër Vucic, "*Drejtori i Institutit pro-rus që nxjerr fitues VV-në me Albin Kurtin dhe Aleksander Vucicin*".

Me këtë sipas parashtruesit të ankesës është bërë shkelje e rëndë e Ligjit Nr.08/L-228 për Zgjedhjet e Përgjithshme në Republikën e Kosovës, respektivisht nenit 34, paragrafi 1, nën paragrafi 1.11. Si provë që dëshmon shkeljen e pretenduar ka bashkëngjitur fotografi nga postimet në rrjetin social facebook.

Në përgjigje në ankesë të paraqitur nga subjekti politik PDK, thekson se fillimisht, para se të trajtojmë meritat e ankesës, e shohim si të rëndësishme për të shqyrtuar çështjen e afatshmërisë së ankesës, pasi që siç mund të vërehet, ankuesi nuk i ka bashkëngjitur si dëshmi asnjë provë me të cilën argumentohet koha në të cilën ka ndodhur shkelja e pretenduar, pasi që në vështrim të provës së bashkëngjitur, dëshmohet vetëm që postimi të jetë shpërndara para 22 orësh, mirëpo nuk mund të vërtetohet koha se kur është bërë Screenshoot, andaj si i tillë është e pamundur që të vërtetohet se në cilën kohë ka ndodhur shkelja e pretenduar në ankesë. Më tej në përgjigje thuhet se PDK, në asnjë mënyrë nuk e konteston faktin se veprimet e z. Rasim Brahim Rexhepi përbejnë përdorim të gjuhës që nxit ose provokon, ose që mund të nxisë ose provokojë një person tjetër për të kryer një akt të dhunës kundër personave tjerë, për të cilat vlerësojnë se padyshim përbejnë veprime të ndaluara.. Mirëpo, konsiderojnë se ankuesi nuk ka arritur që të argumentoj përgjegjësinë subjektive ndaj subjektit politik PDK, pasi që siç do të vërej kolegji i nderuar i panelit, ankuesi me asnjë provë mik ka arritur që të bëjë ndërlidhjen e veprimeve të z. Rasim Brahim Rexhepi, me përgjegjësinë e subjektit politik PDK, mirëpo është mjaftuar vetëm me pretendimin se i njëjti është djali i vëllait i asamblistit, Fikret Rexhepi në Skenderaj. Në këtë mënyrë, LVV ka tentuar të bëjë ndërlidhjen në mes z. Rasim Brahim Rexhepi dhe subjektit politik PDK vetëm për faktin se një familjar i tij (djali i axhës) është asamblist në Komunën e Skenderajt.

Paneli, në kuptim të nenit 9 paragrafi 5, nën paragrafi 5.5 të Rregullores Nr.01/2024, për Procedurat e Parashtrimin dhe Vendosijes së Ankesave të PZAP-it, dhe nenit 84 paragrafi 1 të Ligjit Nr.05/L-031, për Procedurën e Përgjithshme Administrative, me qëllim të ekonomizimit të procedurës, ka bashkuar ankesat Anr.240/2025, A.nr.241/2025, dhe A.nr.242/2025 të paraqitura me datë;29.01.2025, dhe janë trajtuar me një vendim, andaj procedimi i këtyre ankesave evidentohen nën shenjën e përbashkët A.nr.240/2025, për shkak të natyrës së njëjtë të çështjeve të parashtruara nga subjekti politik LVV, kundër subjektit të njëjtë politik PDK, si për nga përmbajtja ashtu edhe për nga kërkesat e paraqitura nga ankesat.

Paneli, pasi që shqyrtoj të gjitha shkresat e lëndës në kuptim të nenit 117 paragrafi 3 të LZP-së, vëren se ankesat janë të bazuara.

Paneli, pas shikimit të shkresave të lëndës të ofruar si provë materiale, nga e cila rrjedh se Rasim Brahim Rexhepi mbështetës i subjektit politik PDK nëpërmes rrjetit social facebook, ka theksuar, *‘Pushiteti tu deponu dosje kundër çlirimtarëve Mimoza tu fol me Raidoiçiçin serbisht kundër veteranëve, e sot në Skenderaj tu knu e tu kcy e tu provoku situatën, masa nuk pyet nuk ban me jau qu dur e gishta se drenicaku e merr tubimin, len shpirtin e ndeshkun rahat mani fushatat qysh i ka hijemu majte jo me pru kurva e loparë e me bo budallakina me qu dure gishta. Drenicë krenoliem me ty edhe kur je ne vësliteresi të uxitjes’*. Gjithashtu ka postuar foto ku shihet Albin Kurti, se bashku me Aleksandër Vucic me shkrim *“Drejtori i Institutit pro-rus që nxjerr fitues VV-në me Albin Kurtin dhe Aleksander Vucicin.”* Kurse Musli Obria ka pastuar foto në sheshin e Skenderaj, duke theksuar se *“PDK TA HA ZEMREN NUK LEJOJM NE ALBIN KURVA E PEDERICA NE SKEDERAJ”*

Sipas Panelit vendosja përdorimi i kësaj gjuhe nga simpatizantët e subjektit politik të PDK-së, PDK Rasim Brahim Rexhepi, dhe Musli Obria, në kuadër të fushatës zgjedhore, konsiderohet shkelje e rregullave zgjedhore në Kosovë, ngase veprimi i marrë në kohë të fushatës zgjedhore ka për qëllim të krijojë një lidhje negative ose të nxisë ndjenja të urrejtjes dhe krijoj atmosferë tensioni dhe përçarjeje. Veprimet i tilla interpretohen si një përpjekje për të manipuluar perceptimin e votuesve, duke krijuar një lidhje negative mes një partie politike dhe një figure politike të përfolur. Kjo mund të shihet si një mënyrë për të përdorur figura të njohura për të stigmatizuar një subjekt politik dhe për të rritur ndjenjat negative kundrejt tij. Paneli vlerëson se partitë dhe kandidatët dhe simpatizantët janë të detyruar të respektojnë etikën zgjedhore dhe të shmangin veprime që mund të sjellin pasiguri apo të përkeqësojnë atmosferën politike. Përdorimi i figurave të tilla të përfolura mund të dëmtojë procesin demokratik dhe të rrisë tensionet në vend. Kjo është një shkelje e rregullave që kërkojnë një fushatë paqësore, të ndershme dhe të drejtpërdrejtë.

Përdorimi i një gjuhe të tillë, sipas vlerësimit të Panelit është në kundërshtim me nenit 34 paragrafi 1 pika 1.11), e LZP-së, me të cilën përcaktohet *“Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjërs si në vijim: ... 1) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve ose duke publikuar ose përdorur fotografi, simbole ose çfarëdo materiali tjetër që ka ose mund të ketë ndikim të tillë”*.

Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.

Me nenin 120 paragrafi 1 nën paragrafi 1.3 të LZP-së, është përcaktuar se në rast se PZAP përcakton se ka ndodhur shkelje e të këtij ligji ose e rregullave të KQZ-së, mundet *“të vendosë një gjobë ndaj një subjekti politik, në vlerë deri në pesëdhjetëmijë (50,000 €) Euro.”*

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimi që përben përsëritje të shkeljes për nga natyra është i njëjtë apo ngjashëm, subjektit politik që ka bërë shkelje të legjislacionit zgjedhor, apo ka bërë shkelje të legjislacionit edhe në proceset e mëparshme zgjedhore, që konsiston në faktin se subjekti politik PDK, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje, dhe në zgjedhjet e mëparshme në Kosovë, që do të thotë se i njëjti është i njoftuar me rregullat zgjedhore.

Andaj Paneli vëren se gjuha e përdorur është në kundërshtim me Kodin e Mirësjelljes për Subjektet Politike, Mbështetësit e tyre dhe Kandidatët gjegjësisht me dispozitat e nenit 34 LZP-së, ku janë të përcaktuara veprimet e ndaluara të subjekteve politike dhe me këto veprime janë shkelur dispozitat e nenit 34 paragrafi 1 nën paragrafi 1.11 të LZP-së.

Paneli me rastin e shqiptimit të gjobës ka pasur parasysh edhe praktikën e mëhershme për rastet të ngjashme si dhe faktin që subjekti politikë në fjalë ka bërë shkelje të natyrës së njëjtë e për të cilat shkelje paneli ka shqiptuar dënime me gjobë.

Paneli ka vlerësuar edhe pretendimet nga përgjigja në ankesë, mirëpo të njëjtat i vlerësoi si të pa bazuara, për faktin se subjekti politik PDK të njëjtat pretendime nuk i ka provuar me asnjë provë të vetme.

Nga arsyet e theksuara me lart, e në kuptim të nenit 34 paragrafi 1 nën paragrafi 1.11), neni 118 paragraf 1 dhe neni 120 paragrafi 1 nën paragrafi 1.3 të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtresa  
A.nr.240/2025, datë;30.01.2025



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimimit të këtij vendimi.